



Tir e lutga: Hans Bürkli, tiradur da pistola. Armon Orlik, sportist grischun da l'onn 2017 e ses bab Pauli Orlik (da san.).

FOTOS G. N. STGIER

Strusch ina surpraisa

Cuira: Notg da sport grischuna

DA GION NUTEGN STGIER / ANR

■ Il lutgader Armon Orlik succeda al freeskier Andri Ragetti sco sportist grischun da l'onn. Parti en quella tscherna è el sco grond favorit ed a la fin er merità quel titel. Tar onur è er vegnids il skiunz Mauro Caviezel e la curridra Jasmine Nunige. Il titel sportist grischun è vegnì surdà l'emprima giada il 1992 e quai a la patinunza Barbara Hunger. Dapi 18 onns undrescha dentant l'Associaziun grischuna per sport sportists e sportistas ed a medem temp vegn er elegì il sportist ubain la sportista da l'onn. La notg da sport grischuna, quella è vegnida introducida avant tschintg onns. Venderdi ha gi lieu en l'Auditorium da la Banca chantunala la 6avla ediziun da la notg da sport grischuna e danovamain è ella daventada in event da gala. Da la partida blera prominenza da sport, da la politica e da l'economia.

Er la presidenta da la regenza è stada preschenta

President da l'Associaziun grischuna per sport è il deputà da Panaduz Remo Cavegn-Wasescha. En ses pled da bainvegni ha el ditg che la notg da sport saja la vi-

trina actuala dal sport grischun. El è er sa mussà ventiraivel che danovamain haja ina societad illustra suandà a l'invitaziun. Amez ils sportists e sportistas eran er Michael Pfiffli, il president dal cussegl grond, cussegliera guvernativa e presidenta da la regenza Barbara Janom Steiner, cusseglier dals chantuns Stefan Engler e cusseglier naziunal Martin Candinas. Er vesì a l'occorrenza han ins intgins sportists che han già gi l'onur da daven-tar dapi il 1992 sportist grischun da l'onn.

Sport collia la populaziun

Sa drizzada a la raspada è er cussegliera Barbara Janom Steiner. Ella ha ditg ch'il sport saja la basa per prestaziuns maximalas. Bunas prestaziuns dals sportists collian er la populaziun e quai er en il Grischun. Il sport saja dentant er la basa per il chit social, ha menziunà la presidenta da la regenza. Il sport munta lura er voluntad da gudagnar, dad esser ventiraivel e da sa chattar bain. El collia er generaziuns e promova l'integraziun.

Ina stagiun perfetga

Il 2016 ha Armon Orlik gi ina stagiun bunamain perfetga e cun in pau daplì cletg avess il lutgader da 22 onns er gudagnà la

lutga finala da la festa federala ad Estavayer cunter Matthias Glarner. Gudagnà ha el lura trais festas chantunalas, quella da la «Schwägalp» sin il «Weissenstein» e la festa da la Svizra dal nordost. Sin basa da quels success ha Orlik merità da vegnir undrà sco sportist grischun da l'onn 2017. Il premi è dotà cun 10 000 francs. Segund en quella tscherna è vegnì il skiunz Mauro Caviezel, il victur da la medaglia da bronz en la cumbinaziun alpina tar ils Campiunadis mundials da skis a San Murezzan da l'enviern passà. Cumplessa il podest ha la curridra Jasmine Nunige, ella ch'è dapi intgins onns la regina dal «Swiss Alpine Marathon»

Onur per in grond talent da bike

In mountainbiker ch'è sin la meglra via da daverar in segund Nino Schurter è il Sursilvan Vital Albin. El ha retschet il premi sco «newcomer» da l'onn ed è sa mussà fitg surstà da quella onur. Il funcziunari/trenader da l'onn 2017 sa numna Hans Markutt, el che viva per la promozziun dal sport da tennis. Sco meglra uniun da l'onn è vegnì undrà il OLG Cuira, la societad da cursas d'orientaziun. Il tiradur da pistola Paul Schnider ha retschet il premi sco sportist da l'onn cun impediments.



Gratulaziun da cussegliera guvernativa Barbara Janom Steiner (dretg) per la curridra Jasmine Nunige.



Da la partida a la saira da gala er Martina e Stefan Engler cun Remo Cavegn-Wasescha, il president da l'Associaziun grischuna per sport (da san.).



Il snowboardist alpin Nevin Galmarini (a san.) e Marc Gianola, il president da la Cuppa Spengler.



Il deputà Leo Jeker, il talent da bike Vital Albin ed il manager da sport Giuseppe Fry (da san.).



Nando Eggenberger, il giuven hockeyaner dal HCD, è er stà nominà sco «newcomer» da l'onn.



La famiglia Caviezel unida: Martina, Mauro e Markus Caviezel (da san.).